

आकाशवाणी

खबरां ---

1. प्रधानमंत्री नरेंद्र मोदी होरें आखेआ ऐ जे उनें'गी इस गल्लै दा पूरा जकीन ऐ जे भारत दी युवा शक्ति तौले गै मुल्लवै गी इक विकसित राश्ट्र बनाई देगा।
2. इसरो नै स्पेडैक्स मिशन दे तैहत अंतरिक्ष च भेजे गेदे दौनें उपग्रैहें गी कामयाबी कन्नै इक-दुए थमां 3 मीटर दे छिंडे पर लेई आंदा ऐ।
3. प्रधानमंत्री मोदी होर कल जम्मू-कश्मीर च सोनामर्ग सुरंग दा उद्घाटन करडन।
4. विदेश मंत्री डॉक्टर सुब्रह्मण्यम जयशंकर होर अमरीका दे नमें-चुने गेदे राश्ट्रपति डोनाल्ड ट्रम्प हुंदे संगंध चुक्कने आहले समारोह च भारत दी नुमाइंदगी करडन।
5. छत्तीसगढ दे बीजापुर जिले च सुरक्षाबलें कन्नै होए दे इक टाक्करे च 3 माओवादी मारे गे'न।
6. महिला हॉकी इंडिया लीग च, दिल्ली एस.जी. पाइपर्स ते ओडिशा वारियर्स बश्कार अज्ज प्रतियोगिता दा उदघाटनी मैच रांची च खेड्डेआ जाह्ग।



PM-Viksit Bharat

प्रधानमंत्री नरेंद्र मोदी होरें आखेआ ऐ जे भारत दी युवा शक्ति तौले गै मुल्खै गी इक विकसित राष्ट्र बनाई देग। अज्ज नमीं दिल्ली दे भारत मंडपम च विकसित भारत युवा नेता संवाद 2025 दे मौके पर बोलदे होई उनें आखेआ जे भारत दी युवा शक्ति देसै च काबले तरीफ बदलाव आह्ना करदी ऐ। मोदी होरें आखेआ जे उनेंगी नौजवानें पर पूरा भरोसा ऐ जे ओहू सब्बनें समस्याएं दा हल तुप्पी लैग। मोदी होरें आखेआ जे महत्वकांक्षी लक्ष्यें गी हासल करने लेई देसै दे हर इक नागरिक दी सक्रिय जिम्मेदारी, शमूलियत, भ्याली ते किट्टे रलियै कोश्ट करने दी लोड़ होंदी ऐ। उनें इस गल्लै पर लो पाई जे भारत समें कोला पैहले कई खेत्तरें च मित्थे गेदे अपने लक्ष्यें गी हासल करा करदा ऐ।

प्रधानमंत्री होरें आखेआ जे इक विकसित भारत ओहू होग जेड़ा आर्थिक रणनीतिक, समाजिक ते सांस्कृतिक लिहाज कन्नै तगड़ा ते सशक्त होग। उनें आखेआ जे पिछले 1 दहाके च 25 करोड़ लोकें गी गरीबी रेखा कोला उबड़ा चुक्केआ गेआ ऐ। शुक्रवार गी शुरू होए दे त्रै रोजा विकसित भारत युवा नेता संवाद नै नौजवानें गी विकसित भारत लेइ, अपने सुझाव, नवाचार ते नमिं काहडें पर आधारित समस्याएं दे हल ते विचार रक्खने लेई शानदार मंच प्रदान कीता ऐ। इस कार्यक्रम दौरान प्रधानमंत्री नरेंद्र मोदी मुल्ख भरै थमां आए दे त्रै ज्हार गतिशील नौजवान नेताएं गी नीति निर्माताएं, राष्ट्रीय ते कुल संसारी सतह दिं हस्तिं कन्नै सिद्धे जुड़ने दा मौका प्रदान कीता ते कन्नै गै देसै दे भविक्ख गी आकार देने गितै अपने विचार बी सांझे कीते।

<><><><><><>

Pravasi Summit Uttarakhand

उत्तराखंड दे मुख्मन्त्री पुश्कर सिंह धामी होरें अज्ज देहरादून च पैहले 'अंतर्राश्ट्री उत्तराखंडी प्रवासी सम्मेलन' का उद्घाटन कीता। इस सम्मेलन दा उद्देश्य विदेश च राज्य दी संस्कृति दा प्रचार करियै उत्तराखंड च रास-पूंजी ते सैलसफा गी बढावा देना ऐ। इस मौके उप्पर धामी होरें आखेआ जे सम्मेलन दे दरान आयोजित सत्रें च सामने आए दे विचार ते संदेश, देश-विदेश च रवै करदे प्रवासी उत्तराखंडी भ्राहें-भैहनें तगर पुजाए जाडन। श्री धामी होरें इस सम्मेलन गी संस्कृति ते भावनाएं दे जुडाव दा इक अनोखा उत्सव करार दित्ता। संवाददाता सम्मेलन दे दरान मुख्मन्त्री होरें दस्सेआ जे हूनै तगर 30 प्रवासियें उत्तराखंड दे केई ग्राएं गी गोद लेई लैते दा ऐ।



ISRO

भारतीय अंतरिक्ष अनुसंधान संगठन-इसरो नै डॉकिंग थमां पैहले स्पाडेक्स कार्जक्रम तैहत अपने दे उपग्रहें गी स्थिर करने च महत्वपूर्ण काजयाबी हासल कीती ऐ। इसरो नै चेसर ते टारगेट उपग्रहें गी सुरक्षित शिंडे पर लेई जाने कोला पैहले उनेंगी 3 मीटर दे शिंडे पर लेई जाने च कामयाबी हासल कीती ऐ। इसरो नै उपग्रहें पर लग्गे दे कैमरे राहें लैती गेदी तस्वीरां सांझा कीतियां न। इक टवीट राहें इसरो नै दस्सेआ जे डेटा दा विश्लेषण करने परेंत गै डॉकिंग प्रक्रिया कीती जाग। इस मिशन आस्तै इसरो आसेआ तैयार कीते गेदे सेंसरें दी डॉकिंग प्रक्रिया कोला पैहले पूरी पराती जांच ते परीक्षण कीता जाग। डॉकिंग मगरा दौनें उपग्रहें गी इक्के अंतरिक्ष यान दे रूपै च नियंत्रित कीता जागं एहदे मगरा

इनेंगी इक्कले कम्म करने लेई अनडॉक कीता जाग। अमरीका, रूस ते, चीन मगरा एह उपलब्धि हासल करने आहला भारत चौथा राष्ट्र बनी जाग।

<><><><><><>

PM-Sonamarg Tunnel

जम्मू-कश्मीर लेई इक महत्वपूर्ण पैहलकदमी दे तैह्त प्रधानमंत्री नरेन्द्र मोदी होर कल बडे मते सामरिक महत्वै आहली 6 किलोमीटर 400 मीटर लम्मी सोनामर्ग सुरंग दा उद्घाटन करडन। प्रधानमंत्री हुंदे दौरे शा पैहले समूलचे खित्ते, खासकरियै श्रीनगर ते मध्य कश्मीर च सुरक्षा सरबन्धी बंदोबस्त निग्गर करी दित्ते गे न। 2 ज्हार 700 करोड़ रुपें दी इस परियोजना कन्नै श्रीनगर ते सोनामर्ग बश्कार पूरे बरे हर रूतै च सिडक संपर्क दी सुविधा उपलब्ध होग ते कन्नै मुकामी कारोबार ते सैलसफा गी बी बढावा थ्होग। इस परियोजना कन्नै श्रीनगर ते लेहू बश्कार सफर दा समें बी घटोग ते एहू इलाकाई ढांचागत विकास ते संपर्क दे लेहाज कन्नै खित्ते च इक ऐतिहासिक गैहू साबत होग।

<><><><><><>

CM Sonamarg Tunnel

प्रधानमंत्री नरेन्द्र मोदी हुंदे आस्सेआ सोनामर्ग सुरंग दा औपचारिक उद्घाटन करने थमां पैहले मुखमंत्री उमर अब्दुल्ला होरें गांदरवल जिले दे सोनामर्ग च परियोजना आली थाहू दा दौरा लाया ते उत्थे कीते जा'रदे इंतजामें दा जायजा लैता। इस मौके पर उंदे सलाहकार नासिर असलम वाणी ते कंगन थमां विधायक मियां मेहर अली होर मजूद हे। मुख सचिव अटल डुल्लू ते कश्मीर दे डिवीजनल कमीशनर होरें मुखमंत्री होरें गी इस

सरबंधै च व्यापक ब्यौरा उपलब्ध करोआया। मुख्मंत्री होरें सुरंगे दा जायजा लैता ते कम्में च लग्गे दे इंजीनियरें ते कम्मगारें कन्नै गल्ल कीती। उनें उस थाहै दा बी दौरा लाया जित्थुआं प्रधानमंत्री होर किट्टै गी संबोधत करगंन।

<><><><><><>

EAM Trump Swearing

विदेश मंत्री डॉक्टर सुब्रह्मण्यम जयशंकर होर अमरीका दे नमें-चुने गेदे राष्ट्रपति डोनाल्ड ट्रम्प हुंदे सगंध चुक्कने आहले समारोह च भारत दी नुमाइंदगी करडन। श्री ट्रम्प होर अमरीका दे 47में राष्ट्रपति बनडन। उनें गी औंदी 20 जनवरी गी सगंध चुकाई जाह्ग। अपनी जात्तरा दे दरान डॉ जयशंकर होर नमीं सरकार दे प्रतिनिधियें ते कार्यक्रम च हिस्सा लैने आहले होरनें गणमान्य लोकें कन्नै बी मलाटी करडन।

<><><><><><>

MED Conclave

मच्छी पालन, पशुपालन ते डेयरिएं सरबंधी मैह्कमें दे केन्द्री मंत्री राजीव रन्जन सिंह होर कल पुणे च इक बहु उद्यम-कारखानादारी विकास सम्मेलन दा उद्घाटन करडन। इस मौके उप्पर ओहू माल-बच्छे सरबंधी 545 करोड़ रुपें शा मते दी 40 परियोजनाएं दा बी उद्घाटन करडन। इस सम्मेलन दा मकसद, नीतियां बनाने आहलें, फैडरेशनें, सहकारी समितिएं, औद्योगिक संगठनें, उद्यमिएं ते माली इदारें गी किट्टे इक्कै मंच उप्पर आहनना ऐ तांजे माल-बच्छे सरबंधी खेत्तर दी समर्थ च बाद्दा कीता जाई सकै।

<><><><><><>

National Youth Day

अज्ज राश्ट्री युवा दिवस ऐ। हर बरे 12 जनवरी गी म्हान आध्यात्मिक गुरू, दार्शनिक ते चिंतक स्वामी विवेकानंद हुंदी जयंती गी युवा दिवस दे रूपै च मनाया जंदा ऐ। राश्ट्रपति, उप-राश्ट्रपति ते प्रधानमंत्री होरें स्वामी विवेकानंद होरें'गी उंदी जयंती दे मौके उप्पर अज्ज श्रद्धांजलि अर्पित कीती। सोशल मीडिया पर इक पोस्ट च राश्ट्रपति होरें आखेआ जे स्वामी विवेकानंद होरें देशै दा महान आध्यात्मिक संदेश पच्छमी जगत च प्रचारित कीता ते भारत दे लोकें बश्कार नमां आत्मविश्वास पैदा कीता। उनें आखेआ जे स्वामी विवेकानंद होरें युवाएं गी राश्ट्र निर्माण ते मनुक्खता दी सेवा च जोगदान लेई बी प्रेरित कीता।

राश्ट्रपति होरें कामना कीती जे स्वामी विवेकानंद हुंदी विरासत जारी रौह्ग ते दुनिया भरै च अनगिनत लोकें गी प्रेरित करदी रौह्ङन। उप राष्ट्रपति जगदीप धनखड होरें आखेआ जे स्वामी विवेकानंद होरें 1893 च शिकाॅगो धर्म संसद दे दरान भारत दी आध्यात्मिकता दा परचम लैह्याया ते देशै दे समावेशी लोकाचार गी अभिव्यक्त कीता। प्रधानमंत्री नरेन्द्र मोदी होरें आखेआ जे स्वामी विवेकानंद होर युवाएं आस्तै इक शाश्वस्त प्रेरणा न, जेह्डी उनें'गी लगातार शक्ति प्रदान करदी रौह्ग। उनें आखेआ जे सरकार स्वामी विवेकानंद हुंदे विकसित भारत दा लक्ष्य हासल करने लेई वचनबद्ध ऐ।

<><><><><><>

Addiction Short Form Videos

हाल च कीते गेदे इक शोध दरान एहू गल्ल सामने आई ऐ जे सोशल मीडिया पर शार्ट फिल्मों दिक्खने करी लोकें गी ब्लड प्रेशर, टेंशन ते डिप्रेशन जेइयां समस्यां पेश आई सकदियां न। यूरोपी हार्ट जनरल च छपी दी इक शोध रिपोर्ट च दस्सेआ गेआ ऐ जे मोबाइल फोन चा निकलने आहिलएं हल्के सतर दिएं रेडियो तरंगें कारण लोकें च हाई ब्लड प्रेशर ते तनाऽ दी शकैत दिक्खने गी लब्बै करदी ऐ। शोध टीम नै 4 जहार 318 लोकें दे आंकड़े किट्टे कीते जिं'दे च नौजवान ते अधेऽ उम्री दे लोक शामिल हे, जेडे मोबाइल पर टकोहदा करियै रातीं सोने शा पैह्ले शार्ट वीडियो ते रीलां दिक्खदे न ते इंदे चा लगभग हर इक च ब्लड प्रेशर दी शकैत पाई गई।

<><><><><><>

Chhattisgarh - Encounter

छत्तीसगढ़ च अज्ज सुरक्षाबलें कन्नै टाक्करे च घट्टोघट्ट त्रै माओवादी मारे गे न। इलाके च माओवादियें दी मजूदगी दी खुफिया जानकारी मिलने परैन्त सुरक्षाबलें दी इक सांझी टीम बीजापुर जिले दे नेशनल पार्क इलाके च तपाशी अभियान पर ही। ऑपरेशन दे दरान अज्ज बडुलै टाक्करा शुरु होई गेआ। सुरक्षाबलें मारे गेदे माओवादियें दिआं लोथां बरामद करी लैती दिआं न। मौके परा भारी मात्रा च थेआर ते गोला-बारूद बी बरामद कीता गेआ ऐ।

<><><><><><>

Cong Scheme

कांग्रेस नै आखेआ ऐ जे दिल्ली च जेगर ओह्दी सरकार बनदी ऐ तां ओहू 'युवा उडान योजना' दे तैहत राश्ट्री राजधानी दे युवाएं गी शर्गिदी लेई माली मदाद उपलब्ध करोडन। अज्ज इस योजना दा शुभारंभ करदे होई कांग्रेस दे वरिष्ठ नेता सचिन पायलट होरें विश्वास जताया जे दिल्ली दे लोक कांग्रेस गी सेवा दा मौका देडन। उनें दस्सेआ जे इस योजना दे तैहत हर म्हीने साड्डे अट्ट ज्हार रपे दित्ते जाडन।



Mahakumbh

आस्था ते मनुक्खता दे सब्बनें शा बड्डे संगम महाकुम्भ दी शुरूआत कल्ल उत्तर प्रदेश दे प्रयागराज च होग। इस बड्डे आयोजन च शामिल होने आहले श्रद्धालुएं दी स्थूलत लेई लोडचदियां सब्बै त्यारियां करी लैती गेदियां न। महाकुम्भ च शामिल होने लेई बडी बह गिनतरी च श्रद्धालु प्रयागराज पुज्जा करदे न। संस्कृति मंत्रालय नै प्रयागराज च कला ग्राम बनाए दा ऐ जित्थे देसै दी समृद्ध-सगोसार ते जीवंत संस्कृति गी प्रदर्शित कीता जा' रदा ऐ। इस ब'रे दा महाकुंभ, दुनिया दा सब्बनें शा बड्डा सांस्कृतिक ते आध्यात्मिक किट्ट होग ते मेद ऐ जे 45 करोड शा मते लोक एह्दे च शामिल होडन। श्रद्धालुएं दी सुरक्षा लेई महाकुंभ नगर च मंदरें ते होरनें महत्वपूर्ण थाहें पर सुरक्षा सरबंधी बंदोबस्त निगरी करी दित्ते गेदे न। मुख् कार्यक्रम लेई 7 घेरें आहली सुरक्षा बवस्था अमल च आह्नी गेदी ऐ। भारती रेलवे आसेआ लक्खा बड्डे जात्तरिएं दी सुरक्षा ते आओजाई जकीनी बनाने लेई 10 ज्हार शा मतियां ट्रेनां चलाइयां जा करदियां न।

<><><><><><>

Puducherry Health Deptt.

पुदुचेरी दे सेहत मैहकमे नै इस गल्लै दी तस्दीक कीती ऐ जे उत्थे इक प्राइवेट अस्पतालै च दाखल कराए गेदे इक बच्चे च ह्यूमन मेटा न्यूमो वायरस HMPV दी लाग पाई गई ऐ। केंद्र शासित प्रदेश दे मैहकमे आसेआ जारी इक विज्ञप्ति च दस्सेआ गेआ ऐ जे इस बच्चे दे पूरी चाल्ली नरोआ होई जाने दे बाद उसी अस्पतालै चा छुट्टी देई दिती गेदी ऐ।

<><><><><><>

CAG-Report

भारतीय जनता पार्टी नै दावा बन्नेआ ऐ जे सी.ए.जी दी रिपोर्ट मूजब दिल्ली शराब घोटाले करी सरकारी खजाने दा 2 ज्हार करोड़ रपे कोला मते दा नुकसान होआ ऐ। कल नमीं दिल्ली च पार्टी मुख्यालय च मीडिया गी संबोधित करदे होई पार्टी दे वरिष्ठ नेता अनुराग सिंह ठाकुर होरें दोष लाया जे शराब घोटाले दे सरगना आम आदमी पार्टी दे संयोजक अरविंद केजरीवाल ना। इस्सै दौरान आम आदमी पार्टी दी नेता पियंका कक्कड़ होरें बीजेपी दे आरोपें गी खारज करदे होई दावा कीता ऐ जे लीक होई दी सी.ए.जी दी रिपोर्ट फर्जी ऐ। उनें आखेआ जे कथित घोटाले च केजरीवाल हुंदे खलाफ कोई सबूत नेई ऐ।

<><><><><><>

Hockey

महिला हॉकी इंडिया लीग च, दिल्ली एस.जी. पाइपर्स ते ओडिशा वारियर्स बश्कार अज्ज प्रतियोगिता दा उदघाटनी मैच रांची च खेड्ढेआ जाह्ग। एहू मैच रातीं 8 बज्जियै 40एं मिंटे पर शुरू होग। महिला हॉकी इंडिया लीग दे पैहले संस्करण च चार टीमां हिस्सा लै'रदिआं ना। इंदे च दिल्ली एस.जी. पाइपर्स, ओडिशा वारियर्स, श्राची राढ बंगाल टाइगर्स ते सूरमा हॉकी क्लब शामिल ना। 15एं दिनें तगर दे लीग चरण दे मुकाबले 24 जनवरी तगर होडन ते फाइनल 26 जनवरी गी खेड्ढेआ जाह्ग। हर इक टीम इक-दुए कन्नै द'ऊं बारी खेड्ढेउन ते अव्वल दर्जे दिआं द'ऊं टीमां, खिताब लेई आमने-सामने होडन। रांची च, 11 मैच खेड्ढे जाडन जदके द'ऊं मैच राउरकेला दे बिरसा मुंडा हॉकी स्टेडियम च खेड्ढे जाडन।



Tennis Australia Open

अस्ट्रेलिया ओपन टेनिस प्रतियोगिता च अज्ज महिलाएं दे सिंगल्स मुकाबले दे पैहले राउंड च शीर्ष नम्बरै दी खड्ढारन बेलारूस दी आरयना सबालेंका नै यू.एस. ओपन जित्ती चुकी दी सोलेन स्टीफन्स गी 6-3, 6-2 कन्नै हराई दित्ता ऐ। 5में नम्बरै दी खड्ढारन चीन दी कविनवेन जेंग, 11में नम्बरै दी पाउला बाडोसा ते 14में नम्बरै दी मिरा एन्ड्रीवा बी दुए राउंड च पुज्जी गेइयां ना। तोआई मर्दे दे सिंगल्स मुकाबले च चीन दे ओलंपिक विजेता जेंग कविनवेन, 6में नम्बरै दे नार्वे दे कैसपर रूडु ते जपान दे की निशिकोरा बी दुए राउंड च

दाखल होई गे ना। उआं भारत दे सुमित नागल, चेक गणराज्य दे टोमस मकैक हुंदे हत्थै
हार दे बार इस प्रतियोगिता थमां बाह्ण होई गे ना।

<><><><><><>